

Checkpoint Color orguyoso di su Reina Infantil, un talento natural

Staf y personal di Checkpoint Color ta di fiesta cu e corona di Reina Infantil cu e princesita Dayreen Maduro a sa di conquista merecidamente diasabra ultimo. Marjorie Vermeer ta conta cu Dayreen ta un mucha cu un talento natural, cu a cuminsa su 'carera' como modelo for di baby, pa e potretnan di promocion di Checkpoint Color. Dayreen semper a gusta para dilanti di camara. Y por bisa cu e persona cu a 'discubri' Dayreen su talento ta Rossini van Wijk, cu a wak Dayreen algun biaha durante sacamento di potret na Checkpoint Color.

For di edad tempran Rossini

a pidi mayornan di Dayreen permiso pa inscribie como modelo den e grupo di Kids in Action di Debra Boekhoudt, caminda el a participa den su prome show di Benetton. Na 2002 Dayreen a cuminsa bai e grupo di modelahe 'Chaz Models' di Chastity Hodge y na Augustus 2002 Dayreen a participa na e competencia di mini-modelo internacional na Santo Domingo, caminda el a gana e premionan di Mini Caribe y Mini Fotogenica Internacional. Na Oktober 2002, Dayreen a gana promer lugar den show di Halloween di Chaz Model den categoria 'little'. Na December 2002, el a gana prome lugar como como modelo mas popular den categoria 'little' y a ser corona como reina dor di Cher Vermeer.

Beta, e mama orguyoso di Dayreen ta conta cu desde chiquito su yiu tabatin e deseo di participa den un eleccion di reina, Dayreen su soño ta pa bira un reina di beyeza, e soño di hopi mucha muhe chiquito. Dayreen ta un mucha tambe cu semper a ser stimula pa kere den su mes y den su talentonan, pero mas cu esaki e ta un mucha

cu un fe hopi grandi. Asina su mama ta conta cu tur dia Dayreen ta hasi su oracion na San Antonio, e oracion preferi di su difunto wela.

Na scol tambe Dayreen ta haci hopi su best, pa semper su puntanan ta halto, e ta conciente cu e mester haci su best pa logra su soñonan di bida. Talves ta pa e motibonan aki asina tanto hende a sostene Dayreen den e soño di su infancia cu awor a bira realidad.

Di parti di Checkpoint Color ta gradici tambe tur hende cu a contribui di un of otro forma den e show y presentacion di Dayreen. Un danki special na Chastity Hodge cu semper ta cla pa apoya Dayreen y Ryan Maduro cu semper a kere den Dayreen. Alabes ta expresa e deseo cu Dayreen por sirbi como un ehempel positivo pa otro muchanan cu tur den bida bo por logra, aunke bo ta un mucha asina chiquito. Importante ta pa bo kere den bo soñonan y haci bo best pa logranan.

Na Dayreen staf y personal di Checkpoint Color kier bisa: 'Gosa di bo corona y reinado y sigi crea soño y metanan di



mucha chiquito, pasobra ta cu e positivismo aki nos ta crea un mundo maravioso pa mañan." Finalmente ta pidi e fanaticado di Dayreen y su coleganan di Paulusschool pa keda pendiente ya cu ta organisando un jump in den e barrio di Sero Preto, e

barrio caminda Dayreen a nace y cu ta orguyoso di nan princesita di bario, un orguyo pa e pueblo di San Nicolas.

Biba Checkpoint Color, Biba Carnaval, Biba e magia di potret y Biba Reina Dayreen Primera...

